

Semai nilai murni elak salah guna ilmu

BH 5 AUG 2000

KUALA LUMPUR, Jumaat - Datuk Seri Dr Mahathir Mohamad berkata nilai murni perlu disemai dalam diri pelajar supaya ilmu yang mereka perolehi tidak disalahgunakan.

Perdana Menteri berkata, kegagalan menyemai nilai murni, akan mendorong mereka menggunakan ilmu yang dikuasai bukan untuk kebaikan masyarakat.

Berucap pada majlis jamuan makan Yayasan Persewaan Bekas Pelajar Kolej Sultan Abdul Hamid (Sahoca) di sini malam ini, beliau berkata antara kesan pelajar yang kurang dipupuk dengan nilai murni ialah mereka tidak akan tahu bersyukur.

"Sementara perlu untuk kita memberi mereka ilmu pengetahuan namun ia perlu seiring dengan usaha menyemai nilai murni.

"Jika seseorang memiliki ilmu tetapi tanpa nilai murni, ia akan digunakan bukan untuk kebaikan masyarakat. . . kekurangan rasa syukur boleh menghancurkan masyarakat.

"Sementara kita menumpukan usaha memberi ilmu kepada pelajar, kita juga perlu memastikan pemimpin masa depan ne-

gara memiliki nilai murni," katanya.

Beliau berkata, krisis ekonomi yang melanda Asia termasuk Malaysia pada 1997 adalah bukti bagaimana ilmu dimiliki pedagang mata wang digunakan semata-mata untuk mengumpul kekayaan sedangkan tindakan itu menyebabkan majoriti rakyat rantau ini menderita.

"Ini adalah contoh bagaimana ilmu digunakan secara salah. Ilmu sepatutnya digunakan untuk kebaikan diri serta orang lain," katanya.

Hadir sama pada majlis itu ialah isteri beliau, Datin Seri Dr Siti Hasmah Mohd Ali; Pengerusi Sahoca, Datuk Syed Abdul Jabbar Shahabudin; serta kira-kira 300 bekas pelajar kolej itu.

Dr Mahathir yang juga Presiden Sahoca berkata, sekarang ada kecenderungan kalangan pelajar yang belum pun meninggalkan universiti tetapi beranggapan bahawa dunia sudah terhutang kepada mereka dan dunia harus menyediakan segala-galanya untuk mereka.

"Mereka tidak berterima kasih bagi apa juga yang dilakukan (oleh kerajaan)," katanya.

Beliau berkata, pelajar

sebagai pemimpin masa depan juga mempunyai tugas untuk berkhidmat kepada masyarakat bagi membina sebuah negara yang lebih makmur dan maju.

Selain itu, katanya, pembangunan yang dicapai sekarang bukan berlaku dengan sendiri tetapi hasil usaha gigih kerajaan dan sokongan rakyat.

"Pembangunan ini tidak akan berlaku jika kita tidak berusaha," katanya sambil mengingatkan rakyat bahawa sikap cepat berpuas hati dan tidak bersyukur boleh memberi kesan buruk terhadap kemakmuran yang ada.

Pada majlis itu, Dr Mahathir turut menerima sumbangan berjumlah RM 1.1 juta daripada individu dan syarikat korporat untuk Tabung Yayasan Sahoca yang akan digunakan bagi memajukan pendidikan negara.

Yayasan itu akan menyediakan biasiswa dan pinjaman pendidikan kepada pelajar miskin terutama dari luar bandar.

Yasan itu juga akan menjalinkan kerjasama dengan Perbadanan Pembangunan Multimedia (MDC) untuk membangunkan Kolej Sultan Abdul Hamid sebagai sebuah sekolah bestari.